

四庫全書

集部

欽定四庫全書

集部

全蜀藝文志卷三十

詳校官內閣中書_臣李采

侍讀_臣孫球覆勘

總校官進士_臣繆琪

校對官中書_臣李奎

謄錄監生_臣馮士新

欽定四庫全書

全蜀藝文志卷三十

明 周復俊 編

序

志序

華陽國志序述

晉常璩

巴蜀厥初開國載在書籍或因文緯或見史記久遠隱沒實多疎略及周之世侯伯擅威雖與牧野之師希同盟要之會而秦資其富用兼天下漢祖階之奄有四海

梁益及晉分益為寧司馬相如嚴君平揚子雲陽成
子玄鄭伯邑尹彭城譙常侍任給事等各集傳記以作
本紀略舉其隅其次聖稱賢仁人志士言為世範行為
表則者名挂史錄而陳君承祚別為耆舊始漢及魏煥
乎可觀然三州土地不復悉載地理志頗言山水歷代
轉久郡縣分建地名改易於以居然辨物知方猶未詳
備於時晉方隆官司星列提封圖簿歲集司空故人君
學士蔭高堂翳帷幙足綜物土不必待本紀矣曩遭阨

運孟夏滔堙李氏據蜀兵連戰結三州傾墜生民殲盡
府庭化為狐狸之窟城郭蔚為熊羆之宿宅遊雉鹿田
棲虎豹平原鮮麥黍之苗千里蔑雞狗之響丘城蕪邑
莫有名者嗟乎三州近為荒裔桑梓之域曠為長野
反側惟之心若焚灼懼益遐棄城隍靡聞廼考諸舊
紀先宿所傳并南裔志驗以漢書取其近是及自所聞
以著斯篇又略言公孫述蜀書咸熙以來喪亂之事約
取耆舊士女英彥又肇自開闢終乎永和三年凡十篇

號曰華陽國志夫書契有五善達道義章法戒通古今表
功勲而後旌賢能恨璩才短少無遠及不早援翰執素
廣訪博采流離困瘵方資腐帛於顛墻之下求餘光於
灰塵之中剷滅者多故有所闕猶愈於遺忘焉蜀紀言
三皇乘祗車出谷口秦宓曰今之斜谷也及武王伐紂
蜀亦從行史記周貞王之十六年秦厲公城南鄭此蜀
道之通久矣而說者以為蜀王因石牛始通不然也本
紀既以炳明而世俗間橫有為蜀傳者言蜀王蠶叢之

間周迴三千歲又云荆人鼃靈死屍化西土後為蜀帝
周萇弘之血變成碧珠杜宇之魄化為子鵲又言蜀
椎髻左衽未知書文翁始知書學按蜀紀帝居房心決
事參代參代則蜀分野言蜀在帝議政之方帝不議政
則正氣流於西故周失紀綱而蜀先王七國皆王蜀又
稱帝此則蠶叢自王杜宇自帝皆周之叔世安得三千
歲且太素資始有生必死死終物也自古以來未聞死
者能更生當世或遇有之則為怪異予所不言況能為

帝王乎碧珠出不一處地之相距動數千里一人之血

豈能致此子鵲鳥今云是雋或曰雋周

今按說文云蜀王望帝淫其相妻慙

亡去為子鵲鳥故蜀人聞子鵲鳴皆起云望帝鵲尸圭切所言與蜀志所述相似爾雅亦云鵲鳥也出蜀中

四海有之何必在蜀昔唐帝萬國時雍虞舜光宅八表

大禹功濟九州后稷封殖天下井田之制庠序之教由

來遠矣孔子曰述而不作信而好古竊比於我老彭則

彭祖本生蜀為殷太史夫人為國史作為聖則僊自上

世見稱在昔及周之末服事於秦首為郡縣雖濱戎夷

亦有冠冕故蜀紀曰大人之鄉方大之國也至於漢興
反當荒服而無書學乎漢書曰郡國之有文學因文翁
始若然翁以前齊魯當無文學哉漢末時漢中祝元靈
性滑稽用州牧劉焉談調之未與蜀士燕胥聊著翰墨
當時以為極歡後人以為惑恐此之類必起於元靈之
由也惟智者辨其不然幸也綜其理數或以為西土嶮
固衿帶易守世亂先違道治後服若吳楚然故逋逃必
萃奸雄闚覷蓋帝王者統天理物必居土中德膺命運

非可資能恃險以干常亂紀雖饗竊名號終於絕宗殄
祀何者天命不可以非詭而邀神器不可以僥倖而取
也是以四岳三塗陽城太室九州之險而不一姓冀之
北土馬之所產古無興國夫恃險憑危不階歷數自能
傳國垂世所未有也故公孫劉氏以敗於前而諸李踵
之覆亡於後天人之際存亡之術可以為永鑒也干運
犯歷破家喪國可以為京觀也今齊之國志貫之一揆
同見不臣所以防狂狡杜姦萌以崇春秋敗絕之道也而

顯賢能著治亂亦以為獎勸也其序曰

先王經略萬國剖分厥甸巴梁式象縣辰九俊述職賦
政以均佐周斃紂相漢亡秦實繁其民世載其俊

述巴志第一

維天有漢鑒亦有光寶司羣望表我華陽炎劉是應洪
祚攸長

述漢中志第二

井絡啓耀文昌契符茫茫禹蹟畫為九州功冒普天率

土以休光靈遐照慶祚爽流邦家濟濟世德球球

述蜀志第三

蠢爾南城在彼要荒漢武德振蠻貊是攘開州列郡幽
裔來王柔遠能邇實須才良甄德表失以明紀綱

述南中志第四

赤德中微巨猾干篡白虜乘釁致民塗炭爰迄靈獻皇
極不建牧后失圖英雄迭迭進覆車齊軌蒙此艱難

述公孫述劉二牧志第五

政去王室權流二桀瓜分天壤宰割民物舍彼信順任
此智計大道既隱詭詐競設並以豪持力爭當世居正
慮明名號絕替身兼萬乘籍同列國

述劉先主志第六

乾坤渾始樹君立王天工人代萬邦是望明不二日地
不二皇苟非其器窮高必亢矇矇後主弗慮弗臧負乘
致寇世業以喪

述劉後主志第七

陽升三九品物始亨帝紘失振任非其良趙倡禍階亂
是用長羅州播蕩朱旌莫亢皮張不造戎醜攸行哀哀
元黎顧瞻靡望

述大同志第八

炎精南飄大維弛綱薨薨特流肆其豺狼蕩雄纂承殲
我益梁牧守顛摧黔首辛嘗三州毀曠悠然以荒絡結
王綱民亦流亡

述李特雄期壽勢志第九

華嶽降精江漢吐靈濟濟多士命世克生德為世雋幹
為時貞略舉士女表諸賢明世濟其美不隕其名

述先賢士女總讚論第十

皇皇大晉下土是覆化澹教洽誕茲彥茂莪莪俊又疊
疊英秀如嶽之崇如蘭之臭經德秉哲綽然有裕

述後賢第十一

博考行故總厥舊聞班序州部區別山川憲章成敗旌
招仁賢抑絀虛妄糾正繆言顯善懲惡以杜未然

述序志第十二

謨曰駟牡駢駢萬馬龍飛陶然斯猶阜會京畿磨獲西
守廩從東廩卹伯勞之旬不從辰嘗茲玆嘉甘心庶幾
中為令德一行可師瓚瑋倣儻貴韜光輝據中體正平
揖宣尼導以禮樂教治化齊木訥剛毅有威有懷鏘鏘
宮縣磬筦諧諧金奏石拊降福孔皆總括道檢總覽幽
微選賢與能人遠乎哉

唐成都記序

唐盧求

蜀國自秦始通秦遺蜀王五美女蜀亦遣五丁迎之到梓潼見一大蛇入山穴中一人掣其尾不能得五人相助大呼拽之山遂崩五丁及秦女皆死惠王遂遣張儀司馬錯從石牛道滅蜀因封公子通為蜀侯以陳莊為相置巴蜀郡遷秦人萬家實之民始能秦言以蜀令張若為太守前時蜀王開明尚納美女為妃蓋武都山之精也及死葬於城西北遣五丁擔其本山之土以為塚今有二石尚在古老言武丁擔云陳莊既為秦公子相

數年遂謀反殺秦公子秦伐蜀誅莊封子暉為蜀侯暉
後母誣暉有罪賜劍自殺蜀人以其冤因為立祠又封
子綰為蜀侯後復疑綰反誅死自此但置守而已後以
李冰為蜀守冰始鑿三江引水以行舟楫岷山多梓栢
大竹坐致材木又溉水開稻田於是沃野千里號為陸
海置綿絡二水以便溉灌作石犀五以壓毒蛟命曰犀
牛後更為耕牛二又作三石人立水中冰非常人也與
江神約曰水竭不致足盛不沒肩大鑿巖崖通沫水道

江之龍大怒冰乃持刀入水與龍鬪龍死遂無水害迄
今蒙利蜀人稱郫繁為膏腴綿絡為浸沃昭襄王時又
白虎為患意廩君之魂也歷四郡傷千二百人王乃募
能殺之者邑萬家金帛稱是也巴夷胸臆瘳中藥何謝
作白竹弩於高樓瞰而射之死王嫌其夷人乃刻石復
田頃田不租十妻不算傷人不論殺人不死與之盟曰
秦人犯夷輸黃龍一雙夷人犯秦償清酒一鍾其人安
之遂號曰武夷其族又有濮賓賓尤武勇居渝水夾水

以居為漢高祖前鋒陷陣善舞已與蜀代為仇讎蜀嘗封弟葭萌於漢中號苴侯命其邑曰葭萌至漢高祖六年始分置廣漢郡高后城楚道開青衣文帝末以廬江文翁為郡守穿煎油口溉田千七百頃立文學選吏子弟皆就學令俊乂之士張叔等十八人東詣博士受七經還以教授於是岷絡之地學比齊魯孝景帝嘉歎遣天下郡國皆立文學自文翁始也文翁明天文災異後以博士徵至侍中揚州刺史孝武帝置四部都尉俾立

十八郭於是郡縣多城觀矣又分牂牁置益州是為南
益州宣帝地節三年穿臨邛蒲鹽井二十置鹽鐵官自
漢興至哀平牧守仁賢宣德立教英偉命代之士其出如
林璽書束帛交馳於梁益之地矣雖魯之洙泗齊之稷
下未足多也且漢徵八士蜀預其四高帝分蜀郡北鄙
置廣漢武帝分南鄙為犍為遂有三蜀之號王莽改郡
守為帥正以蜀郡為導江公孫叔為帥正治臨邛述僭
號後漢光武滅述還為蜀郡順帝即位復為益州郡名

依舊州治大城郡治小城靈帝末以劉焉為牧及卒子璋為嗣建安十九年璋迎漢左將軍劉備至遂滅璋稱帝繼漢號先主治成都魏末司馬昭平蜀復為益州晉受魏禪以州領郡武帝末以成都為國封子穎為王其後賈人李雄僭稱王晉穆帝永和初遣桓溫滅之復為蜀郡譙縱反安帝命朱齡石討平之至梁分益州更置南北二益州以武陵王紀為刺史紀僭帝號領兵東下為湘王所殺後魏廢帝前二年尉遲迥定益州置總管

後迴舉義旗不受代為隋王堅所戮隋開皇元年廢總管置行臺以蜀王秀為西南道行臺尚書令三年復為總管大業元年廢總管為州又改州為郡聖唐武德元年復為總管三年置行臺改為益州以太尉秦王為益州道行臺總管又改為宋大都督府天后析益州置彭蜀漢三州開元二年始以齊景冑為劔南節度營田兼姚鵠等處置兵馬使自此始有節度使也八年以李濬為使去兵馬使章仇兼瓊兼山南西道採訪使其後或

兼或否亦無定制上元二年始分為東西川廣德二年復合為一大厯二年又分為兩川至今不改天寶三載復為大都督府十四載玄宗皇帝巡幸車駕留五月至德二年改為成都府置尹比東西二京號南都後復停大凡今之推名鎮為天下第一者曰揚益以揚為首蓋聲勢也人物繁盛悉皆土著江山之秀羅錦之麗管絃歌舞之多技巧百工之富其人勇且讓其地腴以善熟較其要妙揚不足以侔其半况赤府畿縣與秦洛並故

非上將賢相殊勲重德望實為人所歸服者則不得居此況控帶蠻落阨戎限羌非文武寬猛包羅法度之君子則不能得中庸以是聖庭慎擇尤難其任使號有三曰節度觀察安撫先時南蠻六部不相臣服天子每有恩賞各頒一詔呼六詔開元末節度使王昱受賄上奏合六為一乃封大首師越國公蒙歸義為雲南王始獨稱南詔至楊國忠遙領蜀郡太守兼採訪使遂擾邊聞希立功伐乃有瀘南不利之變貞元中韋令公皋為節

帥招復雲南背蕃歸漢十一月八日置使安撫兼統押
西山八國近界羌蠻等使是為三使韋令公本以奇勲
秉旄鉞思立邊効又在鎮且歲久南詔為其用拓地甚
遠公既卒劉闢繼公後以兵守險為不順誅死家籍沒
後京兆公為節帥酷易軍政殊不以封域為念戍卒固
代邊蠻積忿至太和三年十二月蒙羗巔遂以兵剽掠
至城下杜公填門不敢與爭會監軍使矯詔宣諭蠻人
遂退工功散失良民殲殄其耗半矣列政補完尚不克稱

大中六年四月詔以丞相太原公有驅制羌戎之成績
由邠寧節度司徒同平章事鎮蜀蜀為興壤領州十四
縣七十一戶百萬兵士五萬外疆接兩蕃人性勁勇易
化以道難誣以智公至以儉約帥之以謹廉不伐臨之
以刑賞法制平治之人歡且舞旦夕詠公之德矣先是
西蜀圖經甚備朝野之士多寄聲寫錄主茲務者不勝其
煩遂盡削而潛焚之長吏至即據顯者集為一軸以獻
繇是百不書一大中八年戶曹參軍蘭弘宗甚好學且

目覩司徒相國之異績願付以傳示於後然不以文自
任剪裁疎長蕪言朴略相國乃屬於小子令刊益之且
曰不以淹徐疾速歸於流布以為不朽之事求受命震
怖又不欲以圖經為目乃搜訪編簡目為成都記五卷
經與圖之附益願終弘宗之職庶以此為助也大中九
年八月五日叙

蜀檇序

宋張唐英

唐英嘗觀自古姦雄竊據成都者皆因中原多故而閉

關恃險以苟偷一時之安譬夫穿窬之人利於昏瞋之
夕至於白晝皎然則無能為也且韋臯守蜀二十餘年
其材智機權過於王孟遠矣止欲求兼兩川節鉞而不
能得劉闢惑術士之言自謂才過項羽不數月已就檻
車之縛蓋是時朝廷清明刑政脩舉賢智在位紀綱整
葺彼雖欲不臣勢不能為也使臯闢在五代時其為惡
必有過於王孟者以此知朝廷治則蜀不能亂朝廷不
治則不惟蜀為不順其四方藩鎮之不順亦有不下於

蜀者當王衍之入洛也三蜀之人盡喜中國之有聖人而莊宗總制失馭中外繼叛蒲禹卿慟哭曰觀天下事勢如此蜀人豈有安泰之期耶必重不幸爾洎知祥入蜀之後明宗頗以蜀人為疑凡高貲有力者盡令東徙張中立嘆曰蜀中之叛非蜀人為之也皆朝廷所委用之臣所為也其言蓋有激而云爾善乎田龍游之論曰僭偽之主改廳堂為宮殿改紫綬為赭袍改僚佐為卿相改前驅為警蹕改妻妾為后妃何如常稱成都尹永

無滅族之禍耶茲可謂藥石切至之言也王孟父子四世凡八十年比之公孫述輩最為久遠其間善惡之迹亦可為世之監戒然編錄者如耆舊傳鑑戒錄野人間話之類皆本末顛倒鄙俗無取真宗時知制誥潞公振修九國書有前蜀後蜀世家列傳然而煩簡失當尚多踈略如張扶馮涓張士喬段融蒲禹卿張雲陳及田淳之徒諛諍章疏皆有益於教盡棄而不錄此觀者所以惜其有未備也予家舊藏前蜀開國記後實錄凡一百

三十卷嘗欲焚棄而不忍今因檢閱始終削去煩冗編
年叙事分為十卷其間事實未顯如髯須肥遺遠望績
長禹糧蒲騷之類各為解其失悞凡五代史及皇朝日
歷所載者皆略而不書名曰蜀檇杌蓋取楚史之名以
為記惡之戒非徒衍其小說蓋亦使亂臣賊子觀而恐
懼耳

蜀檇杌後序

陸昭迴

治平四年夏六月兩當縣尹鄧君惟良顯甫自京師歸

傳殿中侍御史裏行張唐英次功前在閩中監征時所
編蜀春秋十卷予嘗得而觀之其編年叙事之體若荀
悅漢紀之例至於褒貶善惡本末貫穿駸駸乎馳於漢
魏作者之間有古良史風初召試祕閣在仁宗時上大
水災異書時政十四事書在英宗朝上慎始書水災封
事二道皆究極乎治亂之變而探索乎天人之際今天
子特排羣議而擢為御史以其勇於敢言也方將摠其
所蘊而大有為於時彼春秋者乃區區龍斷時無所用

心而寄之空言以寓勸戒豈比夫陳壽譙周輩齷齪弄
筆硯紀一方之事而無補於教耶次功舊有國體總要
監今論五卷十卷唐史誅姦發潛論五卷渝南集十卷
補正楚書十三篇樂府歌詩千餘篇皆秘而不傳於人
而春秋最後出顯甫好事密購以歸予因為刊行以廣
其傳昔人得王充論衡藏之以自銜其辯豈予之志哉

成都古今集記序

趙抃

僕繇慶厯至今四入蜀凡蜀中利害情偽風俗好惡瞭

然見之不疑嘗謂前世之士編摭記不失於疎略則失於漫漶不失於鄙近則失於舛雜嚮治平末因取續者舊傳而修正之去年陳和叔翰林以書見貽俾僕酌古準今別為一書此固僕之夙心而未有以自發也繇此參訪舊老周咨碩生緝以事類成十三卷不始乎蠶叢而始乎牧誓之蜀從經也從經則蠶叢不必書而書之於後何也揚雄紀之吾棄之不可也參取之而已矣事或至於數說何也久論之難詳也昔日齊太公仕於周

司馬遷有三說焉疑以傳疑可也神怪死生之事不可以為教書之何也吾將以待天下之窮理者也書亂臣所以戒小人書寇盜所以警出沒書蠻夷所以盡制御之本末終之以伐蜀使萬世之下知蜀之終不可以苟竊也其間一事一物皆酌考衆書釐正譌謬然後落筆如關公墓今荷聖寺闕然有榜焉而仁顯者孟蜀末僧也作華陽記云墓在草場廟在荷聖此目擊之所當棄而從仁顯者也若夫知之有未至編之有未及則亦一

人之功不可以求備然竊意十得八九矣後之君子其亦有照於斯乎

成都古今集記序

范百祿

成都蜀之都會厥土沃腴厥民阜繁百姓浩麗見謂天府
縑縷之賦數路取贍勢嚴望偉卓越他郡朝廷席五
聖之厚基萬齡之泰明燭外遐愛均畿輔凡選建師長
必一時名德中外皆曰可然後以尹茲土其優馭西南
之意槩古邈矣非獨隆於今也蜀之所以為重於天下

雖窮隅鳩舌咸共知之而其可以文載而永久者則往志躋錯近事缺絕殆不足以彰其重熙寧壬子八月詔以參知政事趙公為資政殿大學士再蒞此府蜀之黔黎夙云易擾小異故常必勤上心是時天子方惻然矜之故不憚諉公以遠公倍道而來下車之初釐所當恤亟即民心平紛解累人乃說懌盡知明天子覆育遠方之意甚厚公亦自謂宜於蜀也會翰林學士陳公和叔語之書曰蜀事可觀惜其墜落泯泯不耀公慨然留意每

政事間隙延多學博識之士與之講求故實掇採舊聞
若耳目所及叅諸老長攷覈是非自開國權輿分野占
象州部號名因革之別其鎮其浸岡聯派屬之詳都城
邑郭神祠佛廟府寺宮室學宮樓觀園游池沼建創之
自門閭巷市道里亭館方面形勢至於神仙隱逸技藝
術數先賢遺宅碑版名氏事物種種瑣謫奇詭纖嗇畢
書繇秦漢已來凡為守令聲華有風迹者若干人有唐
迄今知府事者多閎碩端毅之望又若干人其行事暴

於圖史不可勝述其始至若代去之年月序次昭然著
矣厥生鉅人千古不乏澤我文化雋逸迭起科選德進相踵
於朝數百年間無一遺者物有其善雖毫釐亦補實足
以為一方盛觀自惜僭賊乘民凶菑事變不同久近亦
異悉其致寇之由及王師夷難底平之迹與夫歷世蠻
獠叛服不常中國所以驅除羈縻得失之故又足以為
不虞不若之明覽嗚呼既有政以孚其惠又為書以憲
厥後公之於蜀可謂志得而道備矣書成凡若干篇以

類相從為三十卷名曰成都古今集記人之觀之信乎
蜀之為重於天下非虛也哉

華陽國志後序

呂大防

先王之制自二十五家之間書其恭敏任恤等而上之
或月書其學行或歲考其道德故民之賢能褒惡其吏
無不與知之者焉漢魏以還井地廢而王政缺然猶時
有所考察旌勸而州都中正之職尚修於郡國鄉閭士
女之行多見於史官隋唐急事緩政此制遂廢而不舉

潛德隱行非野史紀述則悉無見於時民日益教俗日益卑此有志之士所為歎息也晉常璩作華陽國志於地方人物丁寧反覆如恐有遺雖蠻貊之民并曰之婦苟有可紀皆著於書自云得之陳壽所為耆舊傳按壽嘗為郡中正故能著述若此之詳自先漢至晉初踰四百歲士女可書者四百人亦可謂衆矣復自晉初至於周顯德踰七百年而史所紀者無幾人忠魂義骨與塵埃野馬同沒於丘原者蓋亦多矣豈不重可歎惜哉此

書雖繁富不及承祚之精微然議論忠篤樂道人之善
蜀記之可觀未有過於此者鏤行諸世庶有益於風教
云

重刊華陽國志序

李奎

古者封建五等諸侯國皆有史以記事後世罷封建為
郡然亦必有圖志以具述蓋以疆域既殊風俗各異山
川有險要阨塞之當備郡邑有廢置割隸之不常至於
一士之行一民之善皆有不可沒者顧非筆之於書則

不能也周官職方氏掌天下之地圖辨其邦國都鄙夷
蠻閩貊五戎六狄之人民與其財用之數目至於九穀
之所宜六畜之所產亦未嘗不佔畢而紀其詳況夫環
數千里之地分城置邑殆踰數十中間時異事變往往
裂為偏方霸國其理亂得失蓋有繫天下大數安可使
放絕而無聞乎此晉常璩華陽國志之作所以有補於
史家者流也予嘗攷其書部分區別各有條理其指歸
有三焉首述巴蜀漢中南中之風土次列公孫述劉二

牧蜀二主之興廢及晉太康之混一以迄於特雄壽勢
之僭竊繼之以兩漢以來先後賢人梁益寧三州士女
總讚序志終焉就其三者之間於一方人物尤深致意
雖侏離之氓賤俚之婦苟有可取在所不棄此尤足以
弘宣風教使善惡知所懲勸豈但屑屑於山川物產以
資廣見異聞而已乎本朝元豐間呂汲公守成都嘗刊
是書以廣其傳而載襍荒忽利缺愈多觀者莫曉所謂
予每患此久矣假守臨邛官居有暇蓋嘗博訪善本以

證其誤而莫之或得因撫兩漢史陳壽蜀書益都耆舊傳互相參訂以決所從凡一事而先後失序本末舛逆者則考而正之一意而詞旨重複句讀錯雜者則刊而去之設或字誤而文理明白者則因而全之其他旁搜遠取求通文義者又非一端凡此皆有明驗可信不誣者若其無所考據則亦不敢臆決姑闕之以俟能者焉較以舊本之訛謬大略十得五六矣鋟木既具輒叙所以冠於篇首好古博雅與我同志者願無以夏五郭公之

義而律之嘉泰甲子季夏朔眉丹稜李奎叔廩甫謹序

續成都古今集記序

王剛中

昔清獻公刪取張彭勾延慶鄭暉盧求周封等書為成都古今集記三十卷凡廢興遷徙及城郭官府坊市庫廩儒宮佛室仙館神祠陵墓渠堰樓臺池苑之名數與風俗之好惡人物之臧否方伯監司之至去蠻夷寇盜之起滅木石之殊尤蟲魚之變怪靡不畢載其采獲貫穿亦勤且詳矣自熙寧訖今凡十九年事當紀述者蓋難

遽數而舊記莫或踵繼見聞異辭日月寢久恐遂湮滅
可不惜哉晉陵胡公至常命僚屬論次未究端緒尋遷
宣撫使事復中輟余來此將周歲蒙國威靈邊堠幸帖
息斯民亦安堵如故因以閒隙搜訪纂緝作續記凡二
十二卷前記載古事往往有差誤則辨正之脫遺則補
足之清獻所云知之有未至編之有未及者余固不免
也其亦待於後之君子乎

成都古今丙記序

范成大

前記趙清獻公作於熙寧七年甲寅凡三十卷蜀之始封及分野梁益州劍南西川成都府屬郡縣得名之所自廢置因革之不同攷之詳矣後八十七年當紹興三十年庚辰王恭簡公續為之記有辨其差誤附益其未載者二記今皆具存續記之成距今纔十有八年雖事之當書者不至甚夥然恐自是日月寢久來者難考乃蒐耳目所及者繼書之名曰丙記其乙記已載者皆不重出云

成都古今丁記序

胡元質

成都古今記起自熙寧甲寅前帥趙閱道集之凡三十卷後八十七年當紹興庚辰王時亨復為續記二十二卷廢置因革纖悉巨細靡不載也又十有八年當淳熙丁酉范至能復為丙記十卷距時亨去日未遠雖不至如前續記之多然二書之所不及者則加詳矣予以是年秋代匱帥蜀四路兵民之寄實在焉蜀久困於征輸權酷之額雖減鹽茗之課猶重與其他邊防民政事所

當行利興害去皆有端緒可覆而考也居三年綴為丁記二十五卷粗成一書惟沈黎蕃部繹騷踰時方定變之所起以迄無事隨宜措畫本末具存姑俟論定別為一編合成都四記而觀之往事頓前得過半矣

成都文類序

袁說友

天地之祕藏發而為名山大川山川之秀靈歛而為文章華藻二者相為頡頏而光明焉也兩京三都之賦摹寫天地繪繡山川絢道德挾天庭潤金石諧韶護與乾

坤造化周流盛大於宇宙之間千百萬世下而知有兩
京三都者以此文也然則天地山川而可無此文哉而
可以不傳此文哉益古大都會也有江山之雄有文物
之盛奇觀絕景僊游神跡一草一木一丘一壑名公才
士騷人墨客窺奇吐芳聲流文暢散落人間何可一二
數也凡此者予來三年亦既略睹矣或曰兩京三都以
賦而傳使無傳焉斯文泯矣然則繇漢以來其文以益
而作者今獨無傳可乎有益都斯有此文此文傳益都亦傳

矣爰屬寮士撫諸方策裒諸碑識流傳之所膾炙友士
之所見聞大篇雄章英詞綺語折法度極眩耀其以益
而文者悉登載而彙輯焉斷自漢以下迄於淳熙其文
篇凡一千有奇類為十一目釐為五十卷益之文茲備
矣嗟乎後世之士豈無浮沅湘由巴蜀

闕

如司馬

子長者乎豈無上瞿唐過夔梓賦雪錦如杜少陵者乎
又豈無自西蜀歷荆楚棲遲山水間如田游巖者乎倘
復得如二三公者而訪斯益摯斯文焉則知清寧闔闢

至大至廣之內而有所謂蜀蜀六十州亘五千里之內
而有所謂益益都無量江漢炳靈之內而有所謂文者
其不在此書乎是書也而有傳焉庶幾乎無負於益慶
元元年二月望日謹序

成都志序

元費著

成都居全蜀上游其名稱自西漢始按禹貢蜀為梁州
之分岷山導江東別為沱今導江與沱名縣鎮於成都
此三代而上地志之見書而不可誣者文王之化行乎

江漢之域江有沱詠於二南之先然漢統於江以朝宗
沱附於江以起興江首四瀆歷代祠其神於成都故成都
為江之源而荆揚之江特其委爾考禹迹聲教之所被
稽文王美化之所行徵諸武王遯矣西土之誓言論全
蜀而沱源於成都上游之道江則孰有逾於詩書之為
可信而有據哉謂三代而下秦惠伐蜀而後得與中國
通文翁興學於成都而後得與齊魯比不端本於夫子
刪定之經惟遷史之言是信亦道者過也若曰周衰而

諸侯畔蜀據阻自安職貢廢而文教弛秦惠伐之而後
道路通文翁興學而後風化復斯可矣捨詩書繼自秦
漢以論蜀則未可也全蜀郡志無慮數十惟成都有志
有文類兵餘版燬莫存蜀憲官佐搜訪百至得一二寫
本廼參稽訂正僅就編帙凡郡邑沿革與夫人物風俗
亦概可考焉遂鳩工鋟梓以廣其傳若文類之詳則有
待於後之好事者至正三年二月費著序

四川成都志序

明彭韶

郡邑之有志猶國有史家有譜一省雖非所急百世之下終必賴之蓋求脩己之要治民之本志若無取焉然於稽疆理之分合考政治之因革鑒人才之得失與夫民情風土往迹舊聞皆於是乎徵志惡可無哉況善學者即事反己未必無助也成都古有華陽等志久而失傳宋熙寧間趙清獻公再知成都始刪脩古今事為集記紹興間制置王恭簡公再集熙豐以來事為續記至淳熙間范石湖胡長文二公相繼帥蜀又集南渡以後事

為丙丁二記丙丁言者意以集記為甲續記為乙且次第以俟後人於無窮也凡事目創於集記後三記皆祖述之四記者今皆行於世二千年之蜀中更變故事得不泯者四記之力也自後迄於宋季至元氏二百餘年無有纂脩之者我朝宣德初故少宗伯五羊陳公廷器來為四川憲使乃脩成都府志於古事採四記所言而約之於今事依官脩圖志而新之其於淳熙以後至正以前之事則未暇補入亦無序文凡例可稽蓋未成之

書也陳公文行高雅善於著述豈以當時召入之遽而止歟邇來又五十年矣成化丙申春襄城李公公勉及韶偕處藩憲相與慨嘆茲事若緩而急不可終墜乃延禮致仕紀善黎君士紘貢士徐君山甫重加纂集韶於餘力亦為考校間附以鄙見論序一二至是粗完凡二十五卷其義例頗與集記不同不敢以戊己為差名曰四川成都志惜李公擢貳內臺無從而就正也遺舛之咎其得而辭諸

序鄧都志目錄

楊孟瑛

右鄧都志目錄孟瑛所次第武王賜太公履東至於海
西於河南於穆陵北於無棣孟子亦曰域民以封疆之
界益郡分土守而為邑以是守也故首疆域疆域之內
有山有川故次山川山川險阨邑恃以固故次形勝九
州皆有分星不以是辨野何以察妖祥故次星野世易
物改則邑有併有割故次沿革邑以民為本故次戶口
有人此有土故次田賦有財故次土產山川土田戶口

貢賦必治以官故次官治三里之城七里之郭與民守之故次城郭街與坊巷皆城中之途市則鄉民市買以粟與械器相易所謂以羨補不足者也故次街市坊巷城有坊鄉有里所以區別民居故次鄉里郵驛宣令津梁通往來皆政之不可闕也故次郵驛次津梁政有所宜先莫如鰥窮故次惠政歲有豐凶不可無備故次荒政足兵事相維繫故次武備民為貴社稷次之故次祀典民治神事政具修矣又何加焉曰教之故次學校科

貢則學校所成也科貢茂才異等或行業名世科貢之英也故次人物教化興行賢哲作則則風動於上習變於下故次風俗風俗大都以廉恥節義為重故次貞節次隱逸然必一邑之間得賢長貳為之父母師帥休養以厚生化導以敦俗乃有賴焉故次名宦推封所以勸孝賜高年爵所以敬長皆風化之餘世改人亡遺跡未泯皆人物之餘故次恩典古蹟次丘墓次樓臺惟老釋之教於吾道別為一端故次釋老文所以紀一邑之事

詩則咏歌之者也故以為終惟邑有志猶國有史史掌
於史官日有錄歲有紀代有書郡邑得人則志修否則廢廢
久則事皆逸文獻不足徵矣豈細故哉吾邑之志毀於兵
燹且百年成化甲午教諭陳先生璵嘗有事編纂未脫
稿滿去弘治丙辰麻城明侯紳雅意脩輯請於郡宋公
甫公以屬孟瑛孟瑛延長壽孔蓋臣與同事撫實於稗
官質疑於故老事以類分例以義立類例之端各著臆
說雖才乏三長而事備條目覽疆域則見經畫閱廢置

則見盛衰稽戶口田賦則見貧富考風俗人物則見政教吾鄉之文獻蓋庶幾焉凡治邑者取一編置案牘之間仕優而讀之因文以求義因事以求鑒興廢補敝因革從時吾民尚亦有利向某成是書板行十餘年矣常自病寡陋況多闕遺備官天府特乘餘暇刪定而更刻之序此於目錄左方

夔州府志序

劉瑞

夔介雍及荆古梁州之東徼自岷峨而下山川流峙若

堂奧然夔其門與而峽又門之隘而高者峽口有堆曰
灩澦孤根峭骨獨抗奔濤於終古而諸石牙撐角觚者
奴耳左右二山曰白鹽赤甲砮砢倚天而售奇獻巧如
十二峯者其兒孫乎此豈徒哉乃剛柔之變結而為干
城以閔夫參井之靈孕府治實臨是徼亦雄矣府下有
縣曰奉節曰巫山曰雲陽曰萬曰達以至於建始名凡
十二縱橫無慮千里其間沿革顯晦地勢人物不績異
行風俗食貨與夫古今文字未之或無不志其誰以傳

洪武辛酉改州為府到今無方策可考闕事孰大焉正
德己巳臨川吳君顯之起進士冬官郎中出領夔牧視
篆餘慨厥心已顧賊起兩川戎馬騷屑弗暇越壬申林
見素公殲賊殆盡而民汔小康君乃移札十二縣俾咨
訪所當書者以呈聘文士彙次成志將鐫梓屬予序焉
嗚呼夔其有光也夫先是過夔者或問志有無曰無殆
藐夔為陋邦矣繼今閱是志而知吳君此舉衆弛畢張
雲布星列外煜而中動應歛襟而曰有是哉夔也可忽

諸况形勝交會神摩氣盪而偉人迭出焉其志固不止
此人稱吳君興學慎罰節材重彞典而膏澤乎民者良厚
斯足徵矣嗚呼夔其有光也夫故序



欽定四庫全書

全蜀藝文志
卷三十

二十三

全蜀藝文志卷三十

欽定四庫全書

集部

全蜀藝文志卷三十二

詳校官內閣中書臣李采

侍讀臣孫球覆勘

總校官進士臣繆琪

校對官中書臣李荃

謄錄監生臣馮士新

謄錄監生臣王焜

欽定四庫全書

全蜀藝文志卷三十一

明 周復俊 編

序

集序

陳氏集序

唐廬藏用

昔孔宣父以天縱之才自衛返魯廼刪詩書

唐書文粹
作定禮

述易道而修

陳集
作

春秋數千百年文章粲然可觀者

文粹

無者

也孔子歿二百歲而騷人作於是婉孌浮侈之法

行焉漢興二百年賈誼馬遷為之傑憲章禮樂有老成

人

唐書文粹
無人字

之風長卿子雲之儔瑰詭萬變亦奇特之

士也惜其王公大人之言溺

陳集文粹
並作於

流辭而不顯其

後班張崔蔡曹劉潘陸隨波而作雖大雅不足然其遺

風餘烈尚有典型宋齊已來

文粹作
之末

蓋顓頊矣逶迤陵

頽流靡忘迨至於徐庾天之將喪斯文後進之士若上

官儀者繼踵而生於是風雅之道掃地盡矣易曰物不

可以終否故受之以泰道喪五百歲而得陳君君名

陳集

諱作

子昂字伯玉蜀人也崛起江漢虎視函夏卓立千古

橫制頽波天下翕然質文一變非夫岷峨之精巫廬之

靈則何以生此故有

文粹
作其

諫諍之辭則為政之先也昭

夷之碣則論議之當也國殤之文則大雅之怨也徐君

之議則刑禮之中也至於感激頓挫微顯闡幽庶幾見

變化之朕以接乎天人之際者則感遇篇存焉觀其逸

足駸駸方將搏扶搖而凌太清獵遺風而薄蒿岱吾見

其進未見其止惜乎湮厄當世道不偶時委骨巴山年

志俱夭故其文未極嗚呼聰明精粹而淪剝貪饕桀鰲
以顯榮天乎天乎吾始未知夫天焉昔嘗與余有忘形
之契四海之內一人而已良友歿矣天其喪予今採其
遺文可存者編而次之凡十卷恨不逢作者不得列於
詩人之什悲夫故粗論文陳集有變而為之序至於王
霸之才卓犖之行則存之別傳以繼於終篇云爾

李翰林集序

魏顥

自盤古劃天地天地之氣艮於西南劔門上斷橫江下

絕岷峨之曲別為錦川蜀之人無聞則已聞則傑出是
生相如君平王褒揚雄降有陳子昂李白皆五百年矣
白本隴西乃放形因家於綿身既生蜀則江山英秀伏
羲造書契後文章濫觴者六經六經糟粕離騷糠粃建
安七子七子至白中有蘭芳情理宛約詞句妍麗白與
古人爭長三字九言鬼出神入瞠若乎後耳白久於峨
眉與丹丘因持盈法師達白亦因之入翰林名動京師
大鵬賦時家藏一本故賓客賀公奇白風骨呼為謫仙

子由是朝廷作歌數百篇上皇豫游召白白時為貴門
邀飲比至半醉令製出師詔不草而成許中書舍人以
張洎讒逐游海岱間年五十餘尚無祿位祿位均常人
橫海鷗負天鵬豈池籠榮之顯始名萬次名炎萬之日
不遠命駕江東訪白游天台還廣陵見之眸子炯然哆
如饑虎或嘗束帶風流醞籍曾受道錄於齊有青綺冠帔
一副少任俠手刃數人與友自荆徂揚路亡權窻廻棹
方暑亡友靡潰白收其骨江路而舟又長揖韓荊州延

飲白悞拜韓讓之白曰酒以成禮荊州大悅白始娶於
許生一女一男曰明月奴女既嫁而卒又合於劉劉訣
次合於魯一婦人生子曰頗黎終娶於宋間携昭陽金
陵之妓迹類謝康樂世號為李東山駿馬美妾所適二
千石郊迎飲數斗醉則奴丹砂撫青海波滿堂不爽白
牽酒則樂顥平生自負人或為狂白相見泯合有贈之
作謂余爾後必著大名於天下無忘老夫與明月奴因
盡出其文命顥為集顥今登第豈符言耶解携明年四

海大盜宗室有潭者白陷焉謫居夜郎罪不至此屢經
昭洗朝廷忍白久為長沙汨羅之儔路遠不存否極則
泰白宜自寬吾觀白之文義有濟代命然千鈞之弩魏
王大瓠用之有時議者奈何以白有叔夜之短儻黃祖
過禰晉帝非阮古無其賢所謂仲尼不假蓋於子夏經
亂離白章句蕩盡上元末顯於絳偶然得之沈吟累年
一字不下今日懷舊援筆成序首以贈顯作顯酬白詩
不忘故人也次以大鵬賦古樂府諸篇積薪而錄文有

差互者兩舉之白未絕筆吾其再刊付男平津子掌其
他事跡存於後序

易龍圖序

宋陳搏

且夫龍馬始負圖出於羲皇之代在太古之先今存已
合之位或疑之况更陳其未合之數耶然則何以知之
荅曰於仲尼三陳九卦之義探其旨所以知之也况夫
天之垂象的如貫珠少有差則不成次序矣故自一至
於盈萬皆累累然如絲之於縷也且夫龍圖本合則聖人

不得見其象所以天意先未合而形其象聖人觀象而明其用是龍圖者天散而示之伏羲合而用之仲尼默而形之始龍圖之未合也惟五十五數上二十五天數也中貫三五九外包十五盡天三天五天九并五十之用後形一六无位又顯二十四之為用也茲所謂天垂象矣下三十地數也亦分五位皆明五之用也十分而為六形地之象焉六分而幾四象地六不配在上則一不用形二十四在下則六不用亦形二十四後既合也

天一居上為道之宗地六居下為氣之本天三幹地二地四為之用三若在陽則避孤陰在陰則避寡陽大矣哉龍圖之變岐分萬途今略述其梗概焉西蜀崇龕陳搏序

輿地紀勝序

李壘

東陽王象之儀父著輿地紀勝一書甚鉅書成句余為序且曰吾書收拾天下郡縣山川之精華使人於一寓目之頃而山川俱若效奇於左右以助其筆端取之無

禁用之不竭余告之曰昔昌黎韓公南遷過韶州先從張君使借圖經其詩曰曲江山水聞來久恐不知名訪倍難願借圖經將入界一逢佳處便開看然則天下郡縣山川之精華是真名人志士汲汲所欲知也然所撰圖經類多疎略舛訛失之鄙野多矣必得學者參伍考正而勒為成書然後可據也本朝真宗時翰林學士李宗諤等承詔撰諸道圖經凡一千五百六十六卷今其書存者止十之三四甚可惜也然四方一郡一邑隨所

至亦各有好學之士收攬記識甚備其目一一見於冊
府纂錄最可稱者如唐麗正殿直學士韋述東西兩京
新記及本朝龍圖閣直學士宋公敏求長安河南二志
尤為該贍精密今儀父所著余雖未睹其全第得首卷
所紀行在所以以下觀之則知其論次積日而成政非淺
淺者蓋其書比李氏圖經則加詳比韋宋所著記志庶
幾班馬使人一讀便如身到其地其土俗人才城郭民
人與夫風景之美麗名物之繁縟歷代方言之詭異故

老傳記之放紛不出戶庭皆坐而得之嗚呼儀父之用
心可謂勤矣然余又嘗語儀父曰古人讀書徃徃止用
資以為詩今儀父著書又祇資他人為詩不亦如羅隱
所謂徒自苦而為他人作甘乎儀父笑不荅余以是知
儀父前所與余言者特寓言耳其意豈止此哉夫昌黎
大儒也固嘗云土地之書未嘗一得其門戶且謂古之
人未有不通此而為大賢君子方欲退而徃學焉意其
學也必也窮探力究洞貫本標非若近世庸末昧陋為

口耳之習姑以眩人夸俗而已是則昌黎道術文章之盛所以名當代而傳後世者非以此乎蓋聞之凡為士者學必貴於博則無以至於約然其大歸必貴於有用則始為不徒學也蕭何從沛公入關先收秦府圖書故因以知天下阨塞戶口多少之處漢之得天下此亦其大助東方朔劉向皆以多識博極獲備天子訪問為國家辨疑惑豈曰小補其事今見山海經首本朝劉侍讀原父奉使契丹能言古北口松亭柳河道里之迂直以

詰虜相與驚顧羞慙卒吐實以告士君子識博至此豈
不足以外折四夷之姦心表中國之有人哉是則地里
之書至此始為有用之學至若許敬宗之對唐高宗第
能明帝丘得名所自遂過眩其長以矜怵於人此則為
士者之所笑而不道者也然則余之所望於儀父者固
以朔向及劉侍讀之事豈但以資他人為詩而已乎前
言姑戲耳寶慶丁亥季秋三日

路史別序

費煇

輝自夷陵抵衡湘有為輝言廬陵有君子曰羅長源智
識弘遠所作路史博達該至恨不一日見之以方問族
五羊道當繇吉中心幾有星雲之快而猶竊患不偶比
屆廬陵何期忽偶紹介得接公於闔閭之外議論粲發
間及路史則方錦囊相隨遂獲一覩竒祕然後信所謂
五帝之佐無不賢三皇之佐無不聖為不虛語實天下
之竒作也豈惟如是而已哉公固自謂我朝之文所尚
山谷老泉至於東坡少所甚愛然其發論乃有時而相

似又何邪輝竊論之公之立言遠過賈誼而敘述則在
莊馬之間班范而下不論也讀封建之論則知先王之
制治觀封禪之論則悟聖人之遺意稽小弁之說而父
子兄弟之情親知詩之不主於文讀甘誓之說而君臣
上下之義明知書之不主於事稽微子三仁之論而隱
顯出處之方立知義理之不浮虛稽吳楚書人之說而
尊卑內外之分申知春秋之不褒貶至於祝融論樂之
作則直與樂記齊上下所謂西漢文章能以文叙事者

優為之矣嗟乎不觀論語聖賢之進退無以識三皇五帝之道高不觀路史變故之紛沓無以見三皇五帝之道大使遂行之不惟得管窺甌舉之徒不敢妄述而裊褐談禪之士亦不敢以誕矣向使漢儒有知伊周非攝之論則無莽卓之禍知大蘆非職之說則無曹馬之禍若齊梁有此書則佛老不張唐室有此書則藩鎮不强五代而有此書則十國不狂靖康而有此書則廟社不墟習而讀之固足使亂臣賊子之知懼而可以國家長

久禍亂不作矣實五經之鼓吹而諸子之權衡也竊又評之立蕭曹勲業易作羅氏路史難路史之功固不在於禹下煇之孱微無高銜大具以邀重於人言之有不足信然昔人謂文章自有公議而公亦謂杜甫非詩人識者知公此語則知路史矣丙申六月十五日西蜀費煇序

黃帝素問靈樞集註序

史崧

昔黃帝作內經十八卷靈樞九卷素問九卷迺其數為

世所奉行唯素問耳越人得其一二而述難經皇甫謐
次而為甲乙諸家之後悉自此始其間或有得失未可
為後世法則謂如南陽活人書稱欬逆者噦也謹按靈
樞曰經所言節者神氣之所遊行出入也非皮肉筋骨
也又曰神氣者正氣也神氣之所遊行出入者流注也
井榮輸經合者本輸也舉而並之則知相去不啻天壤
之異但恨靈樞不傳久矣世莫能究夫為醫者在讀醫
書耳讀而不能為醫者有矣未有不讀而能為醫者也

不讀醫書又非世業殺人尤毒於挺刃是故古人有言
曰為人子而不讀醫書猶為不孝也僕本庸昧自髫迄
壯潛心斯道頗涉其理輒不自揣參對諸書再行校正
家藏舊本靈樞九卷共八十一篇增修音釋附於卷末
勒為二十四卷庶使好生之人開卷易明了無差別除
已具狀經所屬申明外准府指揮依條申達轉運司選
官詳定具書送祕書省國子監今崧專訪請名醫更乞
參詳免誤將來利益無窮功實有自時紹興乙亥仲夏

望日史崧題

二江先生文集序

馬涓

二江先生者宋公承之也宋氏簪笏蟬聯為蜀著姓成都屬邑曰雙流者先生所居也左思賦曰帶二江之雙流故士人以二江先生呼之先生天才絕人結髮稱奇童比游場屋則雋譽日出逼人一時輩流望其鋒却避不敢前聞先生充舉首則曰允當無異詞既筮仕隨牒州縣上官歆艷其名爭誘以事有盤錯肯綮處須先生為

決之皆明徹平允朝廷倚辦常兼數職囊印座右累累
然人憫其賢勞而先生撥遣暇豫未嘗失簡編筆研吟
諷度日常曰世間樂孰與此樂吾將終身焉當元祐六
年先生為南省郎涓以晚輩始預賓客之末逮涓從事
秦亭而先生持節來於是獲從長者游以信宿不見為
間濶樽酒雍容每聞先生片語隻句如窺豹一斑嘗鼎
一臠固願熟觀飫賜而不可但知舉警策以驚詫未聞
者今先生之歿二十有七年矣始見先生文集玩味尋

思欲罷不能蓋嘗廢卷而論之孟子曰源泉混混不舍
晝夜盈科而後進放乎四海有本者如是孟子之言固
有自然為文者何獨不然先生博學而精擇者也其學
之博猶採薪者之見一芥掇之見青蔥拔之故於書無
所不讀諸子雜說或出入於聖域者猶冀有得於萬一
其擇之精猶齊王之食雞其蹠須數十雞而後足其所
蘊蓄涵釀汪汪乎胸中殆不發不已故下筆輒不休筆
端馭沓落紙者皆可詠詠成文鉤章棘句軋軋如抽而

後為文也有本者如是豈虛語哉若夫稽往古之是非
究當時之利病上以縫補於廷議下以斟酌於風謠此
先生之文見於祖述憲章可以維持吾道者也翰寫胸
抱形摹物象較重輕於錙銖嬾宮羽於清濁此先生應
時之文以靡麗為工者也訓詁深嚴字畫奇崛體商周
之盤誥追堯舜之碑碣此先生高古之文以簡潔為法
者也至於譙笑間稗官小說旁搜俯拾附益談業此又
文之餘事也淵淵其深渾渾其醇舒徐衍溢而不流激

昂蹈厲而不怒遠之則有稽近之則不誣嗚呼其文之
雄乎自昔論文者晉有陸士衡之說曰石韞玉而山輝
水懷珠而川媚後之論文者無以加此觀先生之文則
君子之所養可知矣唐裴延翰有言文章與政通風俗
以文移每味此語則益知文之有用於世自非小補而
先生之文祇藏於家第為子孫寶祕閱習而不克大流
布於時此平日士論之所惜者今既成集可以傳諸無
窮故輒叙其梗概庶知音者得以覽其詳焉凡歌行詩

賦時議經義論策表啓書序紀誌及裸述總若干首第
為十六卷皆先生之子宏父手自編次宏父博達豪邁
克嗣家風詩曰惟其有之是以似之後之人欲知先生
父子之懿當以是觀之先生之捐館舍也涓嘗為其行
狀以告諸誌墓者故先生之世系官爵與其平生出處
皆載於墓誌副以碑表謚議粲然可攷附於文集之後
此不復書

王君禮詩文集序

楊天惠

余家弟元符頃與成都王君同佐宕渠縣君於家
弟丈人行也家弟以父執事之君家視弟則輩流如
也家弟嘗論君近世遺直老氣鯁固危冠淳古遇不可
於意雖敵以上必盡言挂之不以一毫假人人有不受
無敢悟儻野唯稍引去以故與世聲牙寡合由宕渠歷
資中再不得意輒致其事而歸家弟言如此余肅然心
憚之去年冬有跨已馬從野僮徑造余庭自持刺大言
我王某也余驚起迎置右座問何自來君言聞子名久

特來耳余為設薄具留之留信宿別去後若干月命其子奉平生詩文若干篇授余曰將序以為謁余拜受卒業曰君於詩文深矣體裁質實如其為人而慙詞強句間足自立讀者如若難噉已乃惛惛有前輩家風味蓋學之祖騷而宗選旁出於傳記故兒時已自能賦有州里名既而落魄無所就日與羣輩處晚年詩多出白語斬於曉流俗不以鏤琢為工於是君老矣蓋未始求人亦無求之者而獨有求於余顧余何足以求哉凡

其所知姑識於此

代作集府尹石刻序

楊天惠

公頃繇長安遷尹成都卷燮理之具鎮臨外屏回經緯
之文設飾行臺如醺河渠以溉尋咫尺如峙泰岱以出膚
寸以故倡治有餘日而賦政無遺功間建羽旌俛同民
樂或徙玉帳旁合寶好至於酒酣樂作意氣逸發徹饗
緩帶風味餘美輒布善紙臨素壁遊戲翰墨之娛以志燕
喜之適凡為詩文題紀若干可謂盛也而巨刻細刻光明

磊落上與參墟交輝下與雲山增重蓋公以代言之餘
流而為文以賡歌之緒別而為詩又以詩文之衍溢而
為書故銀鈎玉畫世多有之而西南特為富於是縉紳耆舊
識藻火之為美也過者必肅山祇瀆鬼仰珪璧之為珍
也護之唯謹某竊亦博購而寶蓄之得三十帙將以其
一獻諸公路仰備覽觀而取其副藏諸名山以貲子孫
焉且某聞之欲考盛德者必於去焉觀之昔者周公去
東山而赤舄所履詠歌無射召伯去南國而甘棠所爰

愛思不忘人心同然異世昭合今公道德之光仁義之澤所以被蜀土者與東山南國無異而英詞偉績金石之傳所以遺吾人者亦與赤舄甘棠何以異然以星紀數易閏餘幾更遡瞻巖廊邈在雲漢顧某也無文獨不能效比興之末技寫父兄之遐思乃徒撫奇蹤奉琬筭日與田夫野老雜沓頌歎於玉壘之北此某所以課誦不遑而遺恨亡窮也公開府以某年甲子還朝以某年己巳入禁林升丞弼邁種方隆福祿未央

鶴山師友雅言序

游侶

鶴山公以高明俊偉之姿刻意於學不肯隨聲接響躡
陳駕虛如求驪龍之珠必下九淵而親攬之乃已故其
議論窮極根柢多異乎人匪求異人實能得衆人之所
未得也尚憶嘉定十有四載余方家居公致之潼川郡
齋同諸友讀易徧攷舊說切磋商究之一日言前輩賦雪
詩欲為人所未嘗道者今觀其語亦豈人說所不能道
若周濂溪無極太極乃前無古人耳余因及往歲侍後

溪先生先生謂劉侍郎招美勸閱注疏以為不先此而立論恐徒高明而不實公深然之及公在渠陽大肆其力於經如注疏率三四讀且鈔成編其是若非博考詳說所蓄既厚厥見孔明晚歲披幽抉微指妄扶正一話之出世竦未聞稅君巽父輯為雅言大略可睹然公之再入勸誦金華嘗過余語今日進講至易之泰吾從旁奏內君子外小人固為泰也第在外而心腹是寄不為外在內而情意不親不為內余擊節稱歎公亦自得今

巽父乃不及記則其胸奇之蘊未暇遍以語人者亦多矣嗚呼使天假之年而巽父輩終身左右隨聞必錄則所以私淑後人者又可勝計哉嘉熙三年十月朔南充游侶序

鶴山師友雅言序

稅與權

予登鶴山先生之門蓋歷二紀以先生出入中外間七八年或五六年或三四年每一見則所聞輒一起絕及先生返自南遷起家鎮瀘予執經從之相携入京登宥

府視事泊賜環奉藩以乞夢奠湖海往來永日清夜瞻
前忽後先生非聖之書不讀多發先儒所未言昉於甲
午夏以浹丁酉春隨所得錄之反復玩索如入武庫如
游寶藏如登喬嶽以觀天下斯所謂仰彌高而鑽彌堅
者嗚呼以予四閱寒暑凡所逮聞如此其富則二三子
久相從游而不離左右者人可想而知哉昔嘗見先生
移書蒙齋袁侍郎云某於六經名數文義重下頓工的
然見古人所志所學歷戰國暴秦以後無傳焉極於五

胡之亂影滅跡絕其間豈無經生學士各隨才分有所建立然驚於高遠者惟欲直指徑造以步步而行字字而講者為卑近者則又以區區記誦小小辭章為學問之極功所謂合內外貫精粗者百數十年間始有人講尋以發漢唐之所未講又若於實未有所見者勦說雷同為聲利計以病吾道方欲通古今為一書使之有志於道者猶可推原尋流而學未能信不敢容易下筆也嗚呼先生此志未酬而天奪之矣豈不為千載之恨

用備錄師言揭諸篇端以著先生之志亦因識吾儕小人後死者之悲有宋嘉熙歲在鷄火辰會大火門人巴郡稅與權掩袂書於武林之孤山

周易折衷序

元趙采

易該象數理未作之前其體因象數而立既作之後其理因象數而顯大傳曰河出圖洛出書聖人則之河圖洛書為天地自然之文象數之大原也二圖之象皆九位故伏羲則之畫為長短之九畫成乾坤二卦之小成

由乾坤而八卦八卦而六十四卦以左右交互而觀則
兩卦得十八畫二九也是為先天圖邵子所謂交易之
易也文王則之變伏羲之卦次分上下之二經上卦三
十下經三十四以一反一覆而觀除八正卦外五十六
卦只成二十八卦上經得十八卦下經亦得十八卦二
九也是為後天易程子所謂變易之易也或曰伏羲既
因象推數而作先天交易之易矣文王又因象推數而
作後天變易之易何哉大傳曰易之興也其於中古乎

作易者其有憂患乎夫子蓋謂文王當殷末世憂患而興此易也曷為見其憂患今觀後天反對卦如泰反為否剥反為復晉反為明夷夬反為姤既濟反為未濟舉一二以類推則文王實憂慮天下後世陰陽禍福之相為倚伏治亂安危之相為消長君子小人之相為進退只在一反覆間故示人以用九扶陽而抑陰為君子謀不為小人謀為轉移造化之機此上下經所以皆寓用九之意豈出于聖人之智巧皆倚天地自然之象而加

一倍焉耳自古聖王之致治皆用九如舜命九官禹之
九功九叙九歌是已是以周公作文辭于乾卦首發用
九之義夫子翼之曰天德不可為首也曰乾元用九天
下治也曰乾元用九乃見天則於九曰天則其可過哉
過則其亢矣又於大傳三陳九卦以明文王處憂患之
道上經取三卦而陳之用一九也下經取六卦而陳之
用二九也此夫子因數推理而作十翼也嗚呼易更三
聖而象數義理始備自夫子歿千數百年論易者各據

已見泥象數者流於詭怪說義理者淪於空寂而聖人
憂患作易之旨昧矣至宋有康節邵子推明伏羲文王
之卦畫而象數之學著有伊川程子推衍夫子之意而
卦畫之理明洎武夷朱文公作本義釐正上下經十翼
而還其舊作啓蒙本邵子而發先天雖本義專主卜筮
然於門人問荅又以為易中先儒舊說皆不可廢但互
體五行納甲飛伏之類未及致思耳故愚以為今時學
者之讀易當由邵程朱三先生之說泝而上之以會羲

文周孔之心庶幾可與言易矣然邵子無易解其說僅見於觀物篇故愚是集以程朱傳義為主而附以鄙見間亦竊取先儒象數變互以資發明雖然俗士口易賢人體易聖人忘易孟子著書未嘗及易邵子以為易道存焉且以為善用易人能用易是為知易嗚呼韋編三絕企東家之無過蠹簡百年慨西伯之有憂愚雖衰老願就有道而正焉後學潼川趙采德亮謹序

運氣新書序

前人

天地陰陽之運往過來續木火土金水始終終始如環
斯循六氣相生之序也歲氣起於子中盡於子中故曰
冬至子之半天心無改移子午之歲始冬至燥金三十
日然後禪于寒水以至相火日各六十者五而小雪以
後其日三十復終于燥金丑未之歲始冬至寒水三十
日然後禪于風木以至燥金日各六十者五而小雪以
後其日三十復終于寒水寅申以下皆然如是六十年
至千萬年氣序相生而無間非小寒之末無所于授大

寒之未無所于授大寒之初無所于承隔越一氣不相
接續而截自大寒為次年初氣之首也此造化之妙經
祕而未發啓玄子闕而未言近代楊子建昉推而得之
夫醫家運氣之說惟陰陽大論七篇具存而啓玄子取
以補內經醫流之究竟及此者蓋鮮鄧焱景文貫通儒
書精專醫伎純厚謹審而篤於學演繹七論條分類別
目曰運氣新書經文註義采拾靡遺凡著書欲以明氣
運者未有能若是賅且悉也予又因楊氏所推特表古

聖先賢未發未言之奧於其篇端鄧氏此書之行於世也可無毫髮遺漏矣

莊子正義序

前人

莊子內聖外王之學洞徹天人遭世沉濁而放言滑稽以玩世其為人固不易知而其為書亦未易知也魏晉以來註釋奚翅數十雖淺深高下不同大抵以己見說莊子非以莊子說莊子也錢大中蜀產也澹然樸素好南華經聞清江道士杜充符有唐劍南道士

文如海南華正義命其徒徑往繕寫以歸如獲珍器近
以示予予嘉文氏方外之人乃能獨矯郭氏玄虛之失
而欲明莊子經世之用噫不可謂拔乎儔類者哉昔在
天寶間玄宗蓋嘗賜見正義十卷宋太平興國八年成
都道士任奉古鋟諸本而世不傳講師將為重刻故叙
其所以得書之由若夫得意忘言爽然四解進進乎南
華真人之道遙遊師其自知之

六經補注序

吳澄

先聖王之教士也以詩書禮樂為四術易者占筮之繇
辭春秋者侯國之史記自夫子贊易修春秋之後學者
始以易春秋合先王教士之四術而為六經經焚於秦
而易獨存經出於漢而樂獨亡幸而未亡者若書若禮
往往殘缺惟詩與春秋稍完而已漢儒專門傳授守其
師說不為無功於經而聖人之意則未大明於世也魏
晉而唐注義漸廣至宋諸儒而經學之盛極矣程子之易
立言幾與先聖並然自為一書則可非可以經注論若

論經注則朱氏詩集傳之外俱不能無遺憾也後儒於其既精既當者或未能嚼味其所可取則於其未精未當者又豈人人而能推索其所未至哉予嘗於此重有慨焉而可與者甚鮮也蜀儒黃澤楚望貧而力學往年初識之於筠今年再遇之於江讀易詩書春秋及周官禮記悉欲為之補注補注之書未成而各經先有辯釋宏綱要義昭揭其大而不遺其小究竟謹審灼有真見先儒舊說可從者拳拳尊信不敢輕肆臆說以相是非

用功深用意厚以予所見明經之士未有能及之者也
晚年見此寧不為之大快乎楚望不輕以示人而德化
縣令王君乃為鋟梓以傳予歎美之不足因以論於學
者蓋於諸經沉潛反覆然後知其用功之不易用意之
不苟云

事韻擷英序

前人

昔歐陽公蘇老泉王荊國諸人以黠然銷魂惟別而已
八字分韻賦詩送裴吳江蘇得而字其詩云談詩究乎

而荆國就席擬賦二篇一曰風作鱗之而一曰兩忘我
與而滿座駭服宋以前和詩和意不和韻至荆國東坡
黃山谷並以用韻奇險為工蓋其胸中蟠萬卷書隨取
隨有愈出愈巧故得以相矜尚也倘記覽之博不及前
賢則不能不資於檢閱於是詩韻等書然其間往往
陳腐用之不足起人意江州路教授西蜀張壽翁所編
事韻擷英削去陳腐之字而皆奇險之韻荆國嘗謂晏
元獻公用事的切後見其類藁乃知其有自來纂輯之

書亦不為無功也壽翁此編可為賦詩用韻之助其功不既多矣乎置一表則人人皆用奇險之韻何異於王蘇黃三鉅公也哉

篆書序

前人

秦隸興而篆書廢漢四百年莫有能者觀於漢代碑刻可見矣三國六朝間亦無聞焉唐三百年李當塗一人而已自秦丞相逮於宋初蓋千年僅有徐騎省以能繼當塗自許何斯學之寥寥也宋人能篆書者頗多於唐

蜀魏文靖公至今為人所稱陳伯英魏公鄉人也游藝之暇及此所書千文體整潔真可上希文靖者夫陳之先世少師公于蘇文忠公如大父行參政公當宋而渡之際以詩名家咸淳季年別院省試春秋第一人伯英季父也一家文學之傳不絕伯英名瑛受朝命為郡教授

鶴山雅言序

魏文彞

伏惟先高祖秦國文靖公事宋穆陵以正學直道任斯

文之寄天下不敢以官氏而稱之曰鶴山先生休光懿
德概可想見矣立言垂訓以私淑後人者有九經要義
鶴山大全集易集義此三書昔刊于徽之學官已行於
世其他如周禮折衷經史雜抄觀物經世說與夫門人
所記師友雅言等篇尚藏於家近吳郡金伯祥父即文彞
所藏雅言命子鏐繕寫鋟刻諸梓以廣其傳俾宗族鄉
黨咸與觀焉何其幸歟是則前輩之紀聞伯祥之好義
同為不朽云時至正二十四年龍集甲辰夏五月甲子

朔六世孫文彞百拜謹識

釋奠儀注序

張頤

禮曰皮弁祭菜示敬道也禮書殘缺釋奠釋菜名義徒存儀文無可考者唐開元禮彷彿儀禮饋食篇節文為詳朱文公謂政和新儀差錯獨於開元禮有取申明至於再三竟格不下身沒之後郡邑放而行之能通其義者尠矣中原文物肇開四方取則舍魯奚適闕里昔懼兵革宮室荆榛蓋二十年牲殺器皿衣服不備勢使然

也而儀章度數固多可議者象設非古也開元禮猶云
設席是無象也高臺巍坐而席地之禮不可見帶劔秦
漢冠服之飾也開元禮朝會猶有解劔之席冕服挾劔
未之有聞二者之失所從來久矣神位西坐東向尸位
也配位東坐西向主人位也自尸禮廢禮家謂自內出
者無匹不行自外至者無主不止故立神以配而為主
焉開元以後遷神位南面配位猶故也進顏孟南向參
列如浮圖老子宮者孔氏祖庭廣記謂金大定四十年

所行何所稽乎楹間兩階五齊三酒以四代之器為備
物之享也列數瓦缶果為何說尸尊不就洗禮也登罍爵
于牀洗者以尸尊自居犧象不錯諸地主人遂不坐實
爵簡亦甚矣幣之未薦寘諸神位之左示不敢褻陳之
階庭與主人俱升則不嚴矣蓋事由草創未之講也予
典教於茲思有以正之顧不學雜服不能安禮而雖善
無徵無徵不信乃取朱文公所考訂自儀禮開元禮而
下裒為一編命學徒肄習且與講說義數使之入耳會

心既知義理之安將不期改而自改併附社稷風雨雷
之祀庶幾好禮者有取焉抑禮有本有文是書所載文
也習禮之士因文而究其本知交於神明不徒遵豆之
事微之顯誠之不可揜也如此則可謂知禮矣若夫器
樂冠服之度則又博採諸家之說從其是者訂其失者
與此編并藏孔氏俾後來之文獻有足徵云

草書集韻序

明惠園

予於國政之暇必草書三五幅以暢其情恒以淳化石

刻歷代名臣法帖以師以效我獻祖開國於蜀不貴
金玉所寶者惟聖賢經籍也自經史以下文章翰墨俱
收蓄於內閣一日忽覽書目見有草書集韻取而披閱
因字類以知四聲之韻因韻語以識諸家之體如漢宣
帝魏少帝以鍾繇羲之過庭伯機等書體勢無不全備
然後知草書之源流古人之變化由其形跡而得乎心
法之妙矣惜乎久歷年歲苦於蠹魚於是命工重繡於
梓以永其傳俾後之學草書者有所取法也是為序

全蜀藝文志卷三十一